


傷寒雜病論集解

六



傷寒雜病論集解卷第六

日本 醫師法眼細矢東安惟貞著

辨太陽病脉證并治下

問曰病有結胸有藏結其狀何如答曰按之痛寸脉浮關脉沉名曰結胸也

此設問答以明結胸藏結之異同也結胸者熱氣結聚於心胸之謂也病發於陽而反下之熱氣來其虛而入於心胸間與飲相搏痞結不散者名曰結胸也按之痛謂心下滿而鞭痛也寸脉浮關脉

沉者熱邪結於心胸故也。

何謂藏結答曰如結胸狀飲食如故時時下利寸脈浮關脈小細沉緊名曰藏結舌上白胎滑者難治。

玉函難治之上有爲字外臺同。○藏結者伏藏不驟發之謂夫藏結者但曰如結胸狀則有心下鞭痛而其痛輕乎結胸可知也其病不驟發故飲食如故也時時下利者宿昔胃中有虛寒也其人脇下素有痞連有臍旁而熱有表時醫誤下之熱氣乘其虛而陷於內素痞者受之乃爲藏結也病發而痛引少腹入陰筋者死蓋結胸之根因在胸膈

之飲藏結之根因在脇下之痞與胃中虛冷也小細者根因之脈也沉緊爲裏有痛之診其人舌上白胎滑者有熱有寒未定成實也已痞之寒不堪攻之不攻則病不除故爲難治。

○藏結無陽證不往來寒熱其人反靜舌上胎滑者不可攻也。

玉函藏結下有者字。○此承上條復釋藏結之名義也者字指字義上問下答之辭無陽證者表無熱也不往來寒熱者表裏之分界亦無熱也其病如結胸狀而表總無熱其人反靜者是陰之象陰

主藏故曰藏結言其病不驟發也舌上白胎滑者
內有邪熱有真寒而成之未定成實故為不可攻
也其胎變黃黑而熱愈結始可得攻之夫所謂不
可攻者乃垂誠之辭正欲人詳審其攻之之次第
也

○病發於陽而反下之熱入因作結胸病發於陰而
反下之因作痞也

病發於陽者熱在肌表也發於陰者風冷在腹也
要畧曰瘦人繞臍痛必有風冷穀氣不行而反下
之其氣必衝不衝者心下則痞也結胸者大抵以

結鞭高當於胸為名痞者否塞於中而以天地不
交之否為義蓋結胸為實痞則為虛故治法不亦
同也

所以成結胸者以下之太早故也

表邪應從外解而反下之其熱乘虛而陷入也其
人素飲盛者作結胸脇下有痞者作藏結風冷在
腹者作痞皆以下之早故也此不言痞與藏結者
蓋省文矣

○結胸者項亦強如柔痙狀下之則和宜大陷胸丸
邪結鞭於胸俯則礙而不利項勢必昂有反張之

石印

疑似乃如柔痙狀之謂此邪液布滿於胸中并而上阻也下之則和蓋下之去邪液即所以和其正液也

大陷胸丸方 第五十

大黃半斤 葶藶子半斤 芒消半斤 杏仁半斤

右四味擣篩二味內杏仁芒消合研如脂和散取如彈丸一枚別擣甘遂末一錢匕白蜜二合水二升煮取一升溫頓服之一宿乃下如不下更服取下為效禁如藥法

陷胸者陷下胸膈邪實之謂也此方即大陷胸湯

加葶藶杏仁為丸蓋結胸而至其項亦強則是為高之至也肺氣膈滿可知矣葶藶性過於諸藥洩陽分肺中之氣閉其體輕而象陽故也仲景既用葶藶大棗治喘鳴迫塞不得息此名瀉肺湯其意可知也杏仁潤下以利胸膈氣夫丸者緩也寬緩攻之若急攻則至高之邪却不除矣是以加白蜜而潤導之其因甘而留戀於胸膈下行乃緩可必識此意而觀長沙用法之妙也方後云彈丸一枚如雞子黃大也禁如藥法服白蜜者禁生葱葛苣之類

○結胸證其脉浮大者不可下下之則死
脉浮大者在表者仍多未全結也一病不堪再誤
故下之則死

結胸證悉具煩躁者亦死

此承上文言也結胸證悉具者邪結已深而加煩躁者邪勝而正負雖不經誤治亦死

○太陽病脉浮而動數浮則為風數則為熱動則為痛

浮字貫下三脉故置而字也浮而數浮而動浮而虛數蓋浮動數三脉誤下之各作結胸病也浮則

為風在表數則為傷寒之熱動則為痛風歷節之類凡此三證下之必變結胸也

數則為虛頭痛發熱微盜汗出而反惡寒者表未解也

上文數為傷寒數急之數又有風邪稽久而虛之數頭痛發熱微盜汗出而反惡寒者是也總是表未解者下之皆能令人結胸也

醫反下之動數變遲膈內拒痛

不應下而下之胃中空虛故浮動數脉變為沉遲也膈者心胸之間也拒痛以客氣動膈之故氣宜

通而塞故痛也。蓋大空之地，單氣不能結，必藉痰飲而邪聚於至高之地，大抵邪行如水流，濕火就燥也。夫膈內有燥痰，則為結胸；腸胃有燥實，則為裏證；膀胱水枯者，則為蓄血也。惟其燥者受之，傳變不常，皆因人而使，所謂同聲相應，同氣相求也。
胃中空虛，客氣動膈。

此釋所以膈內拒痛之意也。胃尚無邪，誤下之，故致胃中空虛，外熱乘虛而入，便擾動膈內之痰飲，以為結實，故膈內拒痛也。客氣者，外入則如外客，短氣躁煩，心中懊懣。

胸膈為實，故短氣不足以息也。躁煩謂外為躁擾，內為煩熱也。懊懣苦惱鬱悶之意。

陽氣內陷，心下因鞅，則為結胸。大陷胸湯主之。

陽氣即熱氣，熱氣內陷，與痰飲相搏，結於心下，鞅滿而痛者，此為結胸也。

若不結胸，但頭汗出，餘處無汗，劑頸而還，小便不利，身必發黃。

不結胸，但頭汗出者，熱鬱於內，唯上蒸于頭而然。餘處無汗，劑頸而還，則熱無由以越，兼以小便不利，則濕無所泄，濕熱相搏，身必發黃。宜茵陳蒿湯。

而不言其治者以其條也。

大陷胸湯方 第五十一

大黃_{六兩} 芒消_{一分} 甘遂_{一分} 錢

右三味以水六升先煮大黃取二升去滓內芒消煮一兩沸內甘遂末溫服一升得快利止後服

大黃能潤而最降芒消能熈熱結甘遂直達水氣所結之處乃泄水之聖藥也水結於胸中非此不能除蓋大黃芒消能下胃結而反遺胸上痰飲故甘遂別為末臨服內之欲直達於胸上所結之處使其邪悉無所遺餘爾

○傷寒六七日結胸熱實脉沉而緊心下痛按之石鞮者大陷胸湯主之

此辨不因誤下而自成結胸證者也夫熱實傳裏作結胸乃法之關防不盡者也表熱盛實轉入胃府則為陽明證表熱盛實不入胃府陷入胸間則為結胸證此以其人素胸有膠痰也蓋此條熱實二字形容結胸之狀甚明見邪熱填實於胸間不散漫也沉為在裏緊則鞮痛之診按之石鞮者邪熱聚於此一處故也

○傷寒十餘日熱結在裏復往來寒熱者與大柴胡

湯

夫前條云結胸熱實則恐人誤其結胸之因蓋明雖為熱結在裏然不兼痰飲不作結胸且往來寒熱陽未盡陷熱未全斂結故與大柴胡湯也設熱結在裏四肢厥冷者又有可與大承氣湯者故以往來寒熱而證大柴胡湯之可與也

但結胸無大熱者此為水結在胸脇也但頭微汗出者大陷胸湯主之

無大熱與前條熱實互意也水即痰也是則結胸之根因蓋無痰則不作結胸但燥實而已矣頭微

汗出者陽熱之氣鬱於內而不得越但上蒸于頭而然此復以頭汗而證非大承氣湯可與之也惟大陷胸湯以中之熱結與水結裏與胸脇皆互辭也

大柴胡湯方

柴胡半斤枳實四枚生薑五兩黃芩三兩

芍藥三兩半夏半升大棗十二枚

右七味以水一斗二升煮取六升去滓再煎更服一升日三服更當作三升一方加大黃二兩若不加恐不名大柴胡湯

○太陽病重發汗而復下之不大便五六日舌上燥而渴日晡所小有潮熱從心下至少腹鞭滿而痛不可近者大陷胸湯主之

此辨結胸兼胃實者也。因重發汗復誤下之兩亡其津液胃中乾燥致五六日不大便舌上燥而渴且日晡所小有潮熱者是屬胃也。乃小承氣湯證然潮熱云小則非悉結於胃但乘宿昔所在之痰飲而為結故從心下至少腹鞭滿而痛不可近。即是由正液已傷邪液反聚也。必用大陷胸湯由胸膈以及胃腸蕩滌無餘。若但下腸胃熱結反遺

胸膈痰飲則非法矣。

○小結胸病正在心下按之則痛脉浮滑者小陷胸湯主之。

此痰飲凝聚於心下不被外邪之陷入故曰小結胸病也。正在心下者不似結胸之高而在上按之則痛不按不痛且其脉浮滑較之沉緊不成熱實但痰飲凝聚生鬱熱之診。

小陷胸湯方 第五十二

黃連 一兩 半夏 半升 枳椇實 大枚者

右三味以水六升先煮枳椇取三升去滓內諸藥煮

取二升去滓分溫三服

玉函作黃連二兩○黃連開心下痞結以清鬱熱
半夏能開結痰豁濁氣以還清枯樓仁潤燥滌痰
結去胸膈中垢膩鬱熱

○太陽病二三日不能臥但欲起心下必結脈微弱
者此本有寒分也反下之若利止必作結胸未止者
四日復下之此作協熱利也

外臺寒分作久寒成註復下之作復下利今按之
字衍○太陽病二三日邪仍在表之時也其人不能
臥但欲起也表證不應有此乃責之膈下留飲

心下當結臥則氣壅而愈甚故但欲起也久寒謂
飲之久固者所謂留飲也夫脈微弱者本是心下
有留飲而陽氣不得以發故脈不能與此相應也
醫誤認其心下結以為承氣證若下之利止者邪
氣留結必作結胸也利未止者邪不結於胸但引
留飲而下故至四日復續下利也四日承上文二
三日而言乃下後次日也裏寒挾表熱而利下不
止謂之協熱利也協挾通

△太陽病下之其脈促不結胸者此為欲解也脈浮
者必結胸脈緊者必咽痛脈弦者必兩脇拘急脈細

數者頭痛未止脉沉緊者少欲嘔脉沉滑者協熱利脉浮滑者少下血

此條義疑不可強解

○病在陽應以汗解之反以冷水瀝之若灌之其熱被劫不得去彌更益煩肉上粟起

病在陽者邪在表也蓋與太陽病互文此應以汗解之而與冷水故曰反也瀝之冷水噴也灌之灌洗其身也若然則其熱劫於寒水而不得去但羈留不行是故彌更益煩也肉上粟起者水寒鬱留於表則膚上粒起如粟者出俗云白疹是也肉玉

函作皮

意欲飲水反不渴者服文蛤散若不差者與五苓散

意欲飲水者則口渴燥煩也反不渴者裏有水故也

寒實結胸無熱證者與三物小陷胸湯白散亦可服

寒實謂飲之久固者即留飲也無熱證言不兼外邪也此一條三節皆為水設也第一節以水瀝之若灌之然病未去表也仍在發汗之例第二節言裏有水也故以導水為治第三節言水飲結於胸也故與小陷胸湯若白散

文蛤散方 第五十三

文蛤 五兩

右一味為散以沸湯和一方寸匕服湯用五合

文蛤即海蛤之有文理者能止煩渴利小便化痰軟堅

五苓散方

豬苓十八銖 白朮十八銖 澤瀉一兩六銖 茯苓十八銖

桂枝半兩

右五味為散更於臼中杵之白飲和方寸匕服之日三服多飲煖水汗出愈

白散方 第五十四

桔梗三分 巴豆一分 貝母三分

右三條辨味為散內巴豆更於臼中杵之以白飲和服強人半錢匕羸者減之病在膈上必吐在膈下必利不利進熱粥一杯利過不止進冷粥一杯

桔梗清利胸膈滯氣巴豆辛熱利水穀道乃斬關奪門之將貝母能散心胸鬱結之氣此三物色皆白故名白散

△身熱皮粟不解欲引衣自覆若以水澀之洗之益令熱劫不得出當汗而不汗則煩假令汗出已腹中痛與芍藥三兩如上法

此條疑後人之附添矣。汗出於表而裏急迫故與芍藥以通順血脈也。如上法承上條文蛤五苓小陷胸白散而言。

○太陽與少陽併病頭項強痛或眩冒時如結胸心下痞鞭者當刺大椎第一間肺俞肝俞慎不可發汗發汗則譫語脈弦五日譫語不止當刺期門。

玉函五日作五六日諸註亦同。○邪熱入於胸脇間又兼頭項強痛等表證者謂之太陽少陽併病此證表邪入於裏與血併而結於心下正與熱入血室同類也眩者眩暈也冒者鬱冒也或與時互

言也。夫如結胸心下痞鞭者但血結於心下故爾此眩暈鬱冒之所自來也。當刺脊上第一間大椎及三椎下兩旁肺俞而通肩背壅塞以去頭項強痛刺九椎下兩旁肝俞而瀉心下結血也。此雖有熱不可發汗發汗則損津液而血愈結是以心神為燥熱所昏故為譫語也。脈弦者奪血液之診即以其脈弦故知非胃實之譫語也。當刺期門期門肝之募在不容兩旁各相去一寸五分肝藏血故刺之以瀉血分之熱實也。

○婦人中風發熱惡寒經水適來得之七八日熱除

而脉遲身涼胸脇下滿如結胸狀讖語者此為熱入血室也當刺期門隨其實而取之

玉函及脉經讖語之上有其人二字○邪熱內鬱迫血妄行故經水適然錯來也經水方來七八日於是血室空虛陽熱乘其虛而入血室也夫血室者榮血停留之處經脉所集會也邪熱入而居之此為熱入血室也外熱除去而脉變遲身涼胸脇下滿如結胸狀是邪乘血燥而結於此故爾血燥則不營心家故為讖語當刺期門以通其結也隨其實知其可取而取之也取之瀉之也

○婦人中風七八日續得寒熱發作有時經水適斷者此為熱入血室其血必結故使如瘧狀發作有時小柴胡湯主之

張思聰曰經水適斷四字當在七八日之下○前條七八日言經水來之日數此條七八日言得熱之日數也經水適斷者值經水正來適然斷止也此與前條大同小異適來者因熱入血室而迫使血來血出而熱遂遺也適斷者熱乘血來而遂入之與後血相搏俱留而不出是以其血必結也如瘧狀申釋寒熱也

小柴胡湯方

柴胡半斤 黃芩三兩 人參三兩 半夏半升

甘草三兩 生薑三兩 大棗十二枚

右七味以水一斗二升煮取六升去滓再煎取三升
溫服一升日三服

○婦人傷寒發熱經水適來晝日明了暮則譫語如
見鬼狀者此為熱入血室無犯胃氣及上二焦必自
愈

熱入血室至夜發熱譫語以邪在陰也蓋衛氣晝
日行于陽不與陰爭故晝日明了夜行于陰與邪

相搏故暮則譫語至夜止發熱而不譫語亦為熱
入血室因有輕重之分不必拘于譫語也無與毋
通禁止之辭犯胃氣以禁下言上二焦以禁汗吐
言也此胸膈併胃無邪勿以譫語為胃實而妄下
之但熱隨血下猶之紅汗然蓋上言中風此言傷
寒上言刺次出小柴胡此言經行則熱隨血去自
愈者皆是互相發也

○傷寒六七日發熱微惡寒支節煩疼微嘔心下支
結外證未去者柴胡桂枝湯主之

支結疑微結之誤○傷寒者外邪之總名故謂中

風亦曰傷寒也。支節四支關節也。此曰微惡寒。支節煩疼而不言身體疼痛。且曰微嘔。微結則皆不甚之謂也。發熱惡寒。支節煩疼者。表熱仍在也。微嘔。心下微結者。胸膈亦有微熱也。此皆著微字。未至其甚。况曰外證未去。則微風之遷延也。可知矣。故柴胡桂枝各以半劑為的方也。

柴胡桂枝湯方 第五十五

桂枝

黃芩

人參

甘草

半夏

芍藥

大棗

生薑

柴胡

四兩

右九味以水七升煮取三升去滓溫服一升。本云人參湯作如桂枝法加半夏柴胡黃芩復如柴胡法。今用人參作半劑。

桂枝細註當有一兩半三字。

○傷寒五六日已發汗而復下之。胸脇滿微結。小便不利。渴而不嘔。但頭汗出。往來寒熱。心煩者。此為未解也。柴胡桂枝乾薑湯主之。

傷寒五六日言當行柴胡之時也。而反汗下之。亡其津液。故胸脇滿微結也。微結者。陽熱鬱結之謂。其結但在胸脇而非裏結之甚。故名微結也。此以

醫汗下之過也。津液耗損故小便不利且渴而不嘔。但頭汗出而有仍欲達於外之機。且往來寒熱者邪之所在。即表裏之分界。此非在胃之裏結其熱。但鬱於胸脇而不解。名曰微結也。其鬱者是邪熱。其被鬱者是伏飲。所以但心煩無嘔吐也。

柴胡桂枝乾薑湯方 第五十六

柴胡 半斤 桂枝 三兩 乾薑 二兩 枳椇根 四兩

黃芩 三兩 牡蠣 二兩 甘草 二兩

右七味以水一斗二升煮取六升去滓再煎取三升溫服一升日三服初服微煩復服汗出便愈。

諸註作乾薑牡蠣各三兩外臺亦一作三兩。○此小柴胡湯之變方。乃去人參以桂枝代之。去生薑以乾薑代之。去半夏以枳椇根代之。去大棗以牡蠣代之者也。柴胡黃芩由胸脇而發熱於表。桂枝乾薑散陽鬱開結。甘草為和中之用也。小便不利渴而不嘔者。此少津液之徵。故去半夏加枳椇根以生津液潤枯燥。脇下痞鞭者。以牡蠣化痰更結。而不用大棗生薑者。已汗復下之津液不堪再宜故也。

○傷寒五六日頭汗出微惡寒手足冷心下滿口不

欲食大便鞭脈細者此為陽微結必有表復有裏也
脈沉亦在裏也

傷寒當五六日之時頭汗出微惡寒者表仍未解也手足冷心下滿口不欲食大便鞭脈細者熱結於裏故也然以外證未罷為熱結猶淺故曰陽微結也陽者指外熱而言微結者熱結不甚之謂也蓋意但頭汗出餘處無汗者其人未病之前大便不通續得傷寒熱證於是裏氣壅閉陽氣不得以宣布因而汗不能周於身但上蒸于頭而然此以內熱壅鬱故表氣不通裏氣不達是以微惡寒手

足冷然以閉結未深故有頭汗已心下滿口不欲食者是胃實之徵即熱邪結於心下故也其人大便鞭者本有宿糞而得熱乃蒸為結此裏氣壅閉之所由起也是故榮氣逆於內以致脈行細小雖則似全在裏然以頭有汗故知未全斂結也此為陽微結必有表復有裏也不唯脈細為在裏脈沉亦為在裏也凡脈細脈沉脈緊皆為陽熱鬱結之診

汗出為陽微假令純陰結不得復有外證悉入在裏此釋上文陽微結之意也陽微乃陽邪微結之畧

文夫雖表邪入裏與燥糞俱結於胃然遺頭汗一證未盡入裏仍欲外達而不能達此半在裏半在表乃為陽邪微結宜與小柴胡湯以達之於表也純不雜也陰猶言裏也純陰結言悉入在裏也其證見手足厥冷甚者致脉厥體厥因其外候此名陰結便是裏證熱極少陰篇曰少陰病得之二三日口燥咽乾者急下之宜大承氣湯蓋不論傷寒時疫傳入胃家陽氣內鬱不能外布即便四逆其唯內結壅閉是故榮氣逆於內不能達於四末因致脉行亦細小此邪毒盛而陽氣鬱結故也當急

投承氣湯緩緩下之但見表證脉體純陰誤投溫劑禍不旋踵

此為半在裏半在外也脉雖沉緊不得為少陰病所以然者陰不得有汗今頭汗出故知非少陰也可與小柴胡湯設不了了者得屎而解

傷寒五六日頭汗出微惡寒者為半在表也手足冷心下滿口不欲食大便鞭脉細者為半在裏也不唯細脉為在裏沉緊亦在裏也俱是陽熱鬱結之診縱使此證得裏證沉緊脉不得為少陰厥逆證所以然者陰不得有汗閉結已深何得有汗今

頭汗出有仍欲達於表之陽故知非少陰也非少陰者言非真裏證也宜與小柴胡湯以達之於表然後不了了者當消息胃實而用治故曰得尿而解

○傷寒五六日嘔而發熱者柴胡湯證具而以他藥下之柴胡證仍在者復與柴胡湯此雖已下之不為逆必蒸蒸而振却發熱汗出而解

嘔而發熱者邪熱留於胸膈間而胃口苦熱故也不為逆謂幸免他變也蒸蒸而振者邪氣欲出於表而促乎其出也此經誤下而中氣先虛故爾然

後却發熱汗出而解

若心下滿而鞭痛者此為結胸也大陷胸湯主之但滿而不痛者此為痞柴胡不中與之宜半夏瀉心湯此言下之為逆者也前條曰病發於陽而反下之熱入因作結胸病發於陰而反下之因作痞也大抵熱結則作結胸氣結則作痞也瀉心者瀉去心下痞鞭之謂

半夏瀉心湯方 第五十七

半夏半升 黃芩 乾薑 人參

甘草各三兩 黃連一兩 大棗十二枚

右七味以水一斗煮取六升去滓再煎取三升温服一升日三服

芩連苦寒能降故去心下痞鞭乾薑辛温開痞又與人參甘草俱補下後之胃虛半夏逐水飲大棗助心胸之液

○太陽少陽併病而反下之成結胸心下鞭下利不止水漿不下其人心煩

下條曰太陽少陽併病心下鞭頸項強而眩者慎勿下之若下之利止者邪氣留結乃成結胸其證心下鞭或裏氣虛下利不止者水漿不下其人心

煩宜黃芩湯漿粥入胃泄注止者幸免死矣

○脉浮而緊而復下之緊反入裏則作痞按之自濡但氣痞耳

前條曰病發於陰而反下之因作痞也故此條浮而緊不與前篇謂脉浮緊者法當身疼痛之浮緊同也此與脉法所謂跌陽脉緊而浮浮為氣緊為寒浮為腹滿緊為絞痛之浮緊同即是腹滿腸鳴或寒痛下利之診故曰復下之此所謂病發於陰也而復下之其人遂致裏虛而氣不布於外但裏於心下以作痞也蓋裏虛則氣應外不升應降不

降應化不化而結聚不行者謂之痞也緊反入裏謂以醫下之其腹滿暴減也濡與軟同不鞭不痛而柔軟也按之自濡則不挾飲但氣痞耳

○太陽中風下利嘔逆表解者乃可攻之其人藜藜汗出發作有時頭痛心下痞鞭滿引脇下痛乾嘔短氣汗出不惡寒者此表解裏未和也十棗湯主之

下利嘔逆必非太陽中風證也其人素脇下有痰飲續之得風熱以動宿昔之痰飲故為下利嘔逆此為外邪本病隨作也表解者乃可攻之是申表證仍在者未可攻之意也要畧曰飲後水流在脇

下欬唾引痛謂之懸飲懸飲內痛十棗湯主之藜藜微汗出不流散之貌夫汗出者表熱仍在也然發作有時非表證之晝夜俱篤其人頭痛心下痞鞭滿引脇下痛乾嘔短氣此皆痰飲壅閉氣不流通使然也若汗出惡寒者為風熱未罷汗出不惡寒者表已解之微其汗乃壅逆之汗也此表解裏未和宜十棗湯攻之

十棗湯方 第五十八

芫花 甘遂 大戟

右三味等分各別擣為散以水一升半先煮大棗肥

者十枚取八合去滓內藥末強人服一錢匕羸人服半錢溫服之平旦服若下少病不除者明日更服加半錢得快下利後糜粥自養

三味俱泄水之長藥也大戟得棗則不損脾糜粥取糜爛過熟易化而有能補之意○凡云等分者非分兩之分謂諸藥斤兩多少皆同爾

○太陽病醫發汗遂發熱惡寒因復下之心下痞表裏俱虛陰陽氣並竭無陽則陰獨復加燒鍼因胸煩面色青黃膚暍者難治今色微黃手足溫者易愈

太陽病發其汗遂發熱惡寒者此驟汗之徒亡其

津液邪仍未除也因復下之以虛其裏故心下痞也表裏俱虛者妄汗妄下之內外俱虛也陰陽氣並竭謂表裏津液俱枯涸也無陽則陰獨所謂陽者胃脘之陽也今夫至於表裏俱虛以失胃脘之陽則陰獨行事故手足為厥冷也此可觀末句手足溫者易愈而知也因復欲回其陽以加燒鍼火氣內攻乃為胸煩也其人面色青黃者陽氣大虛之候且膚肉暍動者陽氣外虛不能以主持諸脈故也苟至此則病難治今色微黃者陽氣已復且手足溫者胃脘之陽未脫也故易愈矣素問五藏

生成篇曰黃如枳實者死黃如蟹腹者生

○心下痞按之濡其脉關上浮者大黃黃連瀉心湯主之

痞者否塞於中而怫鬱上逆也心下按之濡者不挾飲故爾前條曰按之自濡但氣痞耳其脉關上浮者以痞在心下也氣痞自濡是以其脉浮但苦寒可瀉其鬱逆也蓋此方乃非下法故煎法以麻沸湯漬之須臾絞去滓温服此取於藥氣而不取味但氣痞故以氣治之也已

大黃黃連瀉心湯方 第五十九

大黃二兩 黃連一兩

右二味以麻沸湯二升漬之須臾絞去滓分温再服

後方及要畧有黃芩一兩 ○麻沸言滾沸如麻也

○心下痞而復惡寒汗出者附子瀉心湯主之

心下痞惡寒汗出者其人兼陽虛也故加附子而各行其事矣下條曰傷寒大下後復發汗心下痞惡寒者表未解也不可攻痞當先解表表解乃可攻痞解表宜桂枝湯攻痞宜大黃黃連瀉心湯蓋此條與彼條同有惡寒證彼條發汗汗未出乃原來之惡寒不罷故求之表也此條汗已出惡寒已

罷而復惡寒汗出故求之陽虛也

附子瀉心湯方 第六十

大黃二兩 黃連一兩 黃芩一兩 附子一枚
別取汁

右四味切三味以麻沸湯二升漬之須臾絞去滓內附子汁分溫再服

宋板作附子二枚者誤

○本以下之故心下痞與瀉心湯痞不解其人渴而口燥煩小便不利者五苓散主之

瀉心湯者本所以降氣痞之鬱逆也治痞而痞不解則非氣聚之痞可知矣渴而口燥煩小便不利

者下後胃虛以致水飲內蓄津液不行故以五苓散利其小便則心下自開也

△一方云忍之一日乃愈

外水不入則所停之水得行痞自消也此一法疑後人之附添

○傷寒汗出解之後胃中不和心下痞鞭乾噫食臭脇下有水氣腹中雷鳴下利者生薑瀉心湯主之

熱去身涼謂之解也汗過而陽衰於內故胃中不和以胃者為津液之主陽氣之府故爾中失健運故虛邪聚於心下而痞鞭也乾噫食臭者胃虛不

能消穀雖其人無過飽猶之過飽然也脇下有水
氣腹中雷鳴下利者胃陽弱不能化水穀故見證
如此也

生薑瀉心湯方 第六十一

生薑^{四兩} 甘草^{三兩} 人參^{三兩} 乾薑^{一兩}

黃芩^{三兩} 半夏^{半升} 黃連^{一兩} 大棗^{十二枚}

右八味以水一斗煮取六升去滓再煎取三升溫服
一升日三服 附子瀉心湯本方加附子半夏瀉心
湯甘草瀉心湯同體別名耳生薑瀉心湯本云理中
人參黃芩湯去桂枝木加黃連并瀉肝法

此半夏瀉心湯加生薑四兩減乾薑三兩中之二
兩者也汗後胃陽衰水穀不化故人參甘草乾薑
補胃陽以理中焦生薑助胃中生發之氣以散水
飲芩連開心下痞以解胸中鬱熱半夏逐水飲以
豁獨氣大棗補心胸之液附子瀉心以下蓋後世

註文

○傷寒中風醫反下之其人下利日數十行穀不化
腹中雷鳴心下痞鞅而滿乾嘔心煩不得安醫見心
下痞謂病不盡復下之其痞益甚此非結熱但以胃
中虛客氣上逆故使鞅也甘草瀉心湯主之

外臺穀之上有水字。○表有邪無論傷寒中風總
是無可下之理而反下之虛其腸胃故其人下利
日數十行中失健運故水穀不化腹中雷鳴也心
下痞鞭而滿者此因胃陽乏而水飲虛氣湊於心
下也乾嘔心煩不得安者心下痞乃失其升降故
心膈鬱熱而然也結熱以其下之表熱內陷者言也
胃中虛醫下之故也容氣謂鬱氣也

甘草瀉心湯方 第六十二

甘草 四兩
黃芩 三兩
乾薑 三兩
半夏 半升
大棗 十二枚
黃連 一兩

右六味以水一斗煮取六升去滓再煎取三升溫服
一升日三服

要畧有人參三兩○此半夏瀉心湯增加甘草一
兩者也人參甘草乾薑補胃陽大棗益心胸之液
黃芩黃連開心下痞以解胸中鬱熱半夏化痰散
濁氣

○傷寒服湯藥下利不止心下痞鞭服瀉心湯已復
以他藥下之利不止醫以理中與之利益甚理中者
理中焦此利在下焦赤石脂禹餘糧湯主之復不止
者當利其小便

湯藥者蕩滌腸胃之藥即下劑也瀉心湯者甘草瀉心湯也已止也謂病瘳也醫見心下痞謂病不盡復下之以重其虛下焦虛脫不能禁固故利不止因復以理中與之利益甚所以然者理中湯者脾胃虛寒下利者服之則愈其能修理中焦故曰理中也此利在醫數下之以賊下焦之關闡故以石脂餘糧固瀉大腸之滑脫而復不止者當利其小便水去則利自止

赤石脂禹餘糧湯方 第六十三

赤石脂 一升 太一禹餘糧 一升

右二味以水六升煮取二升去滓分溫三服

赤石脂其味甘其氣溫其體重其性澇澇而重故能收濕止血而固下禹餘糧其性澇最熱冬月有餘糧處其雪先消此其驗也陳承曰禹餘糧會稽山中出者甚多彼人云昔大禹會稽于此餘糧者本為此爾今按昔在禹王治水利天下禹餘糧亦有成隄防之職而治水之功故以名焉○時珍曰按別錄言禹餘糧生東海池澤及山嶋太一餘糧生太山山谷石中黃出餘糧處有之乃殼中未成餘糧黃濁水也據此則三者一物也生于池澤者

為禹餘糧生于山谷者為太一餘糧其中黃濁水者為石中黃水其凝結如粉者為餘糧凝乾如石者為石中黃

○傷寒吐下後發汗虛煩脈甚微八九日心下痞鞭脇下痛氣上衝咽喉眩冒經脈動惕者久而成痿

吐下後復發汗津液內亡故虛煩也於是經脈亦失其滋養故脈甚微其元氣亦衰可知也蓋乃真元弱雖有日進之飲食然肌肉消瘦不能為肌膚徒其旁滲他溢與飲同事但聚於胸脇間而不足氣以開之則心下痞鞭脇下痛此皆痰飲凝結之

所為也若夫氣逆不已上衝咽喉甚則至眩暈鬱冒而經脈動惕者即氣血衰耗之變也蓋液所以養筋若元氣衰弱穀氣不盛則液枯血滯不行氣日以衰脈道不利筋骨肌肉無氣以生故四肢痿弱不用焉

○傷寒發汗若吐若下解後心下痞鞭噫氣不除者旋復代赭湯主之

汗吐下或過而解則中氣必虛中氣虛則濁氣不降故心下作痞鞭也上焦受中焦氣未和不能消穀故能噫耳

旋復代赭湯方 第六十四

旋復花三兩 人參二兩 生薑五兩 代赭一兩

甘草三兩 半夏半升 大棗十二枚

右七味以水一斗煮取六升去滓再煎取三升温服一升日三服

玉函及諸註代赭下皆有石字○旋復花一名金沸草乃肺家之藥行上焦開胃口可知也代赭石除心家之虛熱故能去噫氣以其色赤其性寒也人參甘草補中虛半夏逐飲大棗斂津液生薑助胃中宣發之氣

△下後不可更行桂枝湯若汗出而喘無大熱者可

與麻黃杏子甘草石膏湯

麻黃杏子甘草石膏湯方

麻黃四兩 杏仁五十箇 甘草二兩 石膏半斤

右四味以水七升先煮麻黃減二升去白沫內諸藥煮取三升去滓温服一升本云黃耳杯

此條見前篇下後作發汗後最好此條蓋重出矣太陽病下之喘而汗出者是誤下之以奪胃中津液故用葛根生津以芩連降壅逆之鬱熱理固然矣此條曰汗出而喘者則無表鬱之辭乃發汗後

事耳。必非下後之證也。故以為重出。

○太陽病外證未除而數下之遂協熱而利利下不止心下痞鞅表裏不解者桂枝人參湯主之。

玉函及脉經無利下二字。○外證未除而數下之以虛其裏故利下不止也。胃虛而濁氣不散故心下痞鞅也。裏虛作利表熱續在故曰遂協熱而利。玉函協作挾蓋通用此證理中湯加桂與之表裏俱解。○協熱利向來為外熱乘虛入裏果爾安得用理中耶。利有寒熱二證但表熱不去下利者皆為協熱利也。

桂枝人參湯方 第六十五

桂枝四兩 甘草四兩 白朮三兩 人參三兩

乾薑三兩

右五味以水九升先煮四味取五升內桂更煮取三升去滓溫服一升日再夜一服。

玉函五升下有去滓二字。○桂枝行陽於外以除風寒容氣甘草乾薑助陽於內以止利白朮行脾氣導濕人參補胃中天真之氣總是補正令邪自却之法也。

○傷寒大下後復發汗心下痞惡寒者表未解也不

可攻痞當先解表表解乃可攻痞解表宜桂枝湯攻痞宜大黃黃連瀉心湯

此曰心下痞惡寒者表未解也則痞者非表邪陷入也明矣蓋大下之以虛胃中則氣聚於心下而成鬱逆謂之痞是故用芩連大黃苦寒之品以降散其鬱逆耳

○傷寒發熱汗出不解心中痞嘔吐而下利者大柴胡湯主之

傷寒發熱言表寒已成熱也其人當汗出則解而其不解者以停食在裏故也其證乃心中痞嘔

吐而下利此停食兼外邪故大柴胡湯下之表裏俱解也

○病如桂枝證頭不痛項不强寸脉微浮胸中痞鞅氣上衝喉咽不得息者此為胸有寒也當吐之宜瓜蒂散

病如桂枝證與前條發熱汗出同頭不痛項不强是明非中風也寸脉候身半以上微者抑陽之診浮者鬱熱之所為也胸中痞鞅與心中痞鞅同氣上衝喉咽者從胸衝於咽也不得息者呼吸不能布氣而短氣也此胸有所阻塞故爾胸有寒者以

停食抑陽即謂之寒也。蓋前條言停食下利故以大柴胡湯下之。此條言停食之初發者故以瓜蒂散吐之也。

瓜蒂散方 第六十六

瓜蒂 一分 赤小豆 一分

右二味各別搗篩為散已合治之取一錢匕以香豉一合用熱湯七合煮作稀糜去滓取汁和散溫頓服之不吐者少少加得快吐乃止諸亡血虛家不可與瓜蒂散。

瓜蒂其味甘苦腐故服之則出嘔氣其用蒂者是

繫蔓之處乃取提舉之義赤小豆通氣除濕散熱而生用之者以其腐氣促吐故爾香豉取功於臭氣以除惡毒煩悶。

○病脇下素有痞連在臍傍痛引少腹入陰筋者此名藏結死。

玉函及脉經病下有者字。○此說藏結之根因也。當在篇首之第三條錯簡在此矣。素舊常也其人脇下常有痞積連在臍傍者是持病痼積之屬今得傷寒表證而誤行攻下以致邪氣入裏與宿積相搏為結痛而其痛引少腹入陰筋者病向于陰。

於法為死

○傷寒若吐若下後七八日不解熱結在裏表裏俱熱時時惡風大渴舌上乾燥而煩欲飲水數升者白虎加人參湯主之

傷寒若吐若下後七八日不解此徒亡其津液則燥熱當益加雖然乘裏虛暫作表熱減當此時也熱結在裏然後鬱極而通則表裏俱熱於是脈洪大而長即邪熱浮於肌表裏無壅滯也時時惡風者裏熱熾盛鬱住表氣欲表未得表故爾大渴舌上乾燥而煩欲飲水數升者燥熱極而津液枯竭

從口咽至胃中俱為乾燥也乃得此湯之寒潤或戰汗或自汗而解

白虎加人參湯方

知母六兩 石膏一斤 甘草二兩 人參三兩

粳米六合

右五味以水一斗煮米熟湯成去滓溫服一升日三服此方立夏後立秋前乃可服立秋後不可服正月二月三月尚凜冷亦不可與服之與之則嘔利而腹痛諸亡血虛家亦不可與得之則腹痛利者但可溫之當愈

此方以下後世註文蓋不知者言之也果如此說則冬月凜冷縱使熱證可一列溫之也此得無昧于隨證治之之言耶

○傷寒無大熱口燥渴心煩背微惡寒者白虎加人參湯主之

傷寒無大熱者汗出後表熱減也口燥渴心煩者津液外出裏熱大熾以焦膈故也背微惡寒者欲表未得表故也

○傷寒脈浮發熱無汗其表不解不可與白虎湯渴欲飲水無表證者白虎加人參湯主之

脈浮者邪仍在表也發熱無汗者表邪壅閉也此是麻黃湯證不可誤與白虎湯若渴欲飲水者燥熱已極乃白虎湯之所主治也無表證謂惡風惡寒頭疼身痛皆除也非謂熱矣以上三條千金皆作白虎湯

○太陽少陽併病心下鞅頸項強而眩者當刺大椎肺俞肝俞慎勿下之

前條曰太陽與少陽併病頭項強痛或眩冒時如結胸心下痞鞅者當刺大椎第一間肺俞肝俞慎不可發汗發汗則譫語脈弦五六日譫語不止當

刺期門蓋與此條互發也彼曰不可發汗此曰勿下之夫汗下兩不可何以故也此證本非外邪之所與但氣凝血結而聚於心下以爲之證故刺大椎肺俞肝俞而散其結血也蓋彼言發汗讖語當刺期門此言下後方治也則如下文

○太陽與少陽合病自下利者與黃芩湯若嘔者黃芩加半夏生薑湯主之

此言前證下之後下利不止者方治也前條曰太陽少陽併病而反下之成結胸心下鞅下利不止水漿不下其人心煩夫據此則合字是併字之誤

自字乃傳寫之謬加矣故改合字刪去自字而始得從順焉

黃芩湯方 第六十七

黃芩 三兩 芍藥 二兩 甘草 二兩 大棗 十二枚

右四味以水一斗煮取三升去滓溫服一升日再夜一服

黃芩芍藥清血熱甘草大棗調脾胃

黃芩加半夏生薑湯方 第六十八

黃芩 三兩 芍藥 二兩 甘草 二兩 大棗 十二枚

半夏 半升 生薑 一兩半

右六味以水一斗煮取三升去滓温服一升日再夜一服

其人兼飲則嘔半夏生薑為嘔家聖藥

○傷寒胸中有熱胃中有邪氣腹中痛欲嘔吐者黃連湯主之

胃中伏寒邪胸中鬱熱故腹中痛欲嘔吐也胸中有熱胃中有邪氣是言其因也腹中痛欲嘔吐是言其證也

黃連湯方 第六十九

黃連 三兩 甘草 三兩 乾薑 三兩 桂枝 三兩

人參 二兩 半夏 半升 大棗 十二枚

右七味以水一斗煮取六升去滓温服晝三夜二疑非仲景方

諸註温服下有一升二字○人參甘草乾薑温胃散寒黃連苦寒降胸中鬱熱桂枝辛温開胸胃間邪鬱半夏滌飲止嘔逆大棗斂液於胸中此半夏瀉心湯去黃芩以桂枝代之而倍加黃連二兩者也疑非仲景方五字後世註文蓋不知者言之也
○傷寒八九日風濕相搏身體疼煩不能自轉側不嘔不渴脉浮虛而澹者桂枝附子湯主之

傷寒八九日已發其汗乃陽衰弱之時也風濕乘其虛而入之是以其病陽氣不行血氣鬱滯也蓋此證有本來感於天地之風濕而病者或有汗後雨天開戶牖感於雨風而病者或有汗後衣被不變更濕濡肌膚而病者三者其所受雖殊而為病則一矣身體疼煩不能自轉側者濕邪浸淫陽氣鬱滯故也夫人手之舞之足之蹈之皆藉有陽氣而輕矯無前何至不能自轉側此豈可委咎於濕乎本是因陽虛使然也其人不嘔不渴則裏亦無陽鬱也且其脉浮虛而濇則陽虛之候復決於脉

故與桂枝附子湯而益陽氣以除外濕也

若其人大便鞞小便自利者去桂加白水湯主之

鞞當作難自當作不○大便難者不通也此水濕

不從大便去且小便不利則水氣愈蓄於內故去

桂加水而理脾氣以下滲其濕也

桂枝附子湯方 第七十

桂枝 四兩 附子 三枚 生薑 三兩 大棗 十二枚

甘草 二兩

右五味以水六升煮取二升去滓分温三服

此方益陽氣而除外濕也故以桂矣後方益陽氣

而除內濕也故以木矣

去桂加白朮湯 玉函名木附湯 第七十一

附子 三枚 白朮 四兩 生薑 三兩 甘草 二兩

大棗 十二枚

右五味以水六升煮取二升去滓分溫三服初一服
其人身如痺半日許復服之三服都盡其人如冒狀
勿怪此以附子朮併走皮內逐水氣未得除故使之
耳

此藥氣將行使然也附子朮走皮內逐水氣之語
上文小便自利當作小便不利可以知焉

法當加桂四兩此本一方二法以大便鞅小便自利
去桂也以大便不鞅小便不利當加桂附子三枚恐
多也虛弱家及產婦宜減服之

此後世註文蓋不知者言之也

○風濕相搏骨節疼痛掣痛不得屈伸近之則痛劇
汗出短氣小便不利惡風不欲去衣或身微腫者甘
草附子湯主之

此言前條之較重者也乃陽虛之證但陽浮越於
外故汗出也水氣薄於內故短氣也濕勝則水氣
不行故小便不利也惡風不欲去衣者陽氣大虛

之候也。身微腫者，濕外薄也。不外薄，則不腫。故曰：或也。附木益陽行脾，以逐水氣。桂甘達於外，以逐濕。

甘草附子湯方 第七十二

甘草 二兩 附子 二枚 白朮 二兩 桂枝 四兩

右四味以水六升，煮取三升，去滓，溫服一升，日三服。初服得微汗，則解。能食，汗止，復煩者，將服五合，恐一升多者，宜服六七合為始。

要畧及成本：汗止作汗出，始作妙。今以宋板為正。
汗止為句，復煩對初服得微汗而言，煩乃藥煩也，將進也。

○傷寒脈浮滑，此以表有熱，裏有寒，白虎湯主之。

林億按：表裏字差矣。○滑為裏熱，浮滑則表亦熱。此邪熱浮於肌表，裏無壅滯之脈也。裏有熱，表有寒，即前條表裏俱熱時，惡風之謂矣。裏熱熾盛，鬱住表氣，欲表未表之故也。得白虎寒潤，則或戰汗，或自汗而解。

白虎湯方 第七十三

知母 六兩 石膏 一斤 甘草 二兩 粳米 六合

右四味以水一斗，煮米熟湯成，去滓，溫服一升，日三服。

○傷寒脉結代心動悸炙甘草湯主之

夫傷寒者熱病也邪氣內鬱陽氣不得宣布積陽
為火是以津液每為熱搏遂致氣血虛耗元氣隨
衰乃見結代脉也動而中止能自還者此為結也
不能自還者此為代也皆由氣血虛耗不能相接
續故爾既而心動悸者此是敗軍獨步之心渠奚
寧靜也邪

炙甘草湯方 第七十四

甘草^{四兩} 生薑^{三兩} 人參^{二兩} 生地黃^{一升}
桂枝^{三兩} 阿膠^{二兩} 麥門冬^{半升} 麻仁^{半升}

大棗^{三十枚}

右九味以清酒七升水八升先煮八味取三升去滓
內膠烱消盡温服一升日三服一名復脉湯

諸註作大棗十二枚玉函千金翼同宋板○桂枝
甘草益胸中之陽大棗補少氣少津液人參補虛
轉正地黄補陰通血脉阿膠補血與液此有膠物
而接續之義麥門冬與地黄俱滋陰復脉清血寧
悸麻仁潤五藏利大腸且有緝續之義生薑開胃
散飲不使滋潤藥凝滯之也又加清酒以助藥力
內充胃氣外達肌表

○脉按之來緩時一止復來者名曰結又脉來動而中止更來小數中有還者反動名曰結陰也脉來動而中止不能自還因而復動者名曰代陰也得此脉者必難治

此段為結代二脉下註脚也結者為邪所抑正氣不能亟達故留結也結陰即結之敗脉元氣漸衰故然此復脉湯之所主也代陰者死脉也予之短期可辭

右辨太陽病脉證并治下

凡四十八章
闕疑一章

傷寒雜病論集解卷六畢

